

PRIJEDLOG

Na osnovu člana 132, a u vezi sa članom 124. tačka f) Zakona o zaštiti od požara i vatrogastvu ("Službene novine Zeničko-dobojskog kantona", broj: 5/11), člana 7. Pravilnika o uslovima, osnovama i kriterijima za razvrstavanje građevina u kategorije ugroženosti od požara ("Službene novine Federacije BiH", broj: 79/11) i člana 18. Statuta Općine Maglaj-prečišćen tekst ("Službene novine Općine Maglaj", br. 8/07, 3/08 i 6/08), Općinsko vijeće Maglaj na _____sjednici, održanoj _____, d o n o s i :

ODLUKU o naknadama za vatrogastvo

OPĆE ODREDBE

Član 1.

Ovom Odlukom utvrđuje se obaveza plaćanja naknade za vršenje vatrogasne djelatnosti, obveznici plaćanja, način utvrđivanja visine naknade za vatrogastvo, namjena sredstava i rokovi plaćanja.

Član 2.

Vatrogasna djelatnost je stručna i humana djelatnost, koja je u funkciji zaštite osnovnih ljudskih prava na život i materijalnih dobara.

Vatrogasna djelatnost obuhvata aktivnosti na gašenju požara i spašavanju ljudi i materijalnih dobara ugroženih požarom i eksplozijom, pružanju tehničke pomoći u nezgodama i opasnostima izazvanim prirodnim i drugim nesrećama, učešće u provođenju preventivnih mjera zaštite od požara i eksplozija, kao i obavljanju drugih poslova vezanih za zaštitu i gašenje požara i spašavanje ljudi i materijalnih dobara ugroženih požarom.

Član 3.

Vatrogasnu djelatnost obavljaju vatrogasne jedinice, vatrogasna društva i vatrogasni savezi, u skladu sa nadležnostima utvrđenim Zakonom o zaštiti od požara i vatrogastvu ("Službene novine Zeničko-dobojskog kantona", broj: 5/11).

OBVEZNICI PLAĆANJA NAKNADE ZA VATROGASTVO

Član 4.

Obveznici plaćanja naknade za vatrogastvo su sva pravna i fizička lica registrovana za obavljanje djelatnosti u poslovnom prostoru (sve otvorene i zatvorene poslovne površine kod kojih postoji požarna ugroženost).

Član 5.

Poslovni prostori iz prethodnog člana, svrstavaju se u slijedeće kategorije:

I kategorija:

- poslovni prostori čija je korisna površina svih prostora veća od 6001 m²,
- benzinske pumpe sa više od dva mjesta za pretakanje goriva ili rezervoarom većim od 1000 m³, skladišta nafte kapaciteta većeg od 50 tona,

- međugradske telekomunikacijske linije, bazne stanice i relejni tornjevi, elektro dalekovodi i trafostanice, energetske objekti instalirane snage veće od 1 MW i građevine za proizvodnju toplotne energije snage veće od 1MW.

II kategorija:

- poslovni prostori čija je korisna površina svih prostora veća od 3001 m², a manja od 6000 m²,
- benzinske pumpe sa do dva mjesta za pretakanje goriva ili rezervoarom manjim od 1000 m³, skladišta nafte kapaciteta manjeg od 50 tona,
- energetske objekti instalirane snage manje od 1 MW i građevine za proizvodnju toplotne energije snage manje od 1MW.

III kategorija :

- poslovni prostori kod kojih je korisna površina svih prostora veća od 601 m², a manja od 3000 m².

IV kategorija:

- poslovni prostori korisne površine veće od 201 m², a manje od 600 m².

V kategorija :

- poslovni prostori korisne površine veće od 101 m², a manje od 200 m².

VI kategorija:

- poslovni prostori korisne površine veće od 41 m², a manje od 100 m².

VII kategorija:

- poslovni prostori korisne površine do 40 m².

VIII kategorija:

- privredna društva koja gazduju šumama, po hektaru obraslom šumom.

Član 6.

Pravna lica koja formiraju vlastitu profesionalnu vatrogasnu jedinicu isključuju se od obaveze plaćanja naknade.

Član 7.

Obveznici iz člana 4. ove Odluke koji registruju firmu bit će oslobođeni od plaćanja naknade do kraja tekuće godine u kojoj je firma registrovana.

Obveznici iz člana 4. ove Odluke su obavezni, ukoliko dođe do promjene adrese poslovnog prostora ili odjave djelatnosti, najkasnije u roku od 15 dana obavijestiti Službu civilne zaštite o nastalim promjenama.

Ukoliko obveznici iz člana 4. ove Odluke ne prijave promjene iz prethodnog stava, plaćanje naknade za vatrogastvo im ostaje obaveza.

Od obaveze plaćanja naknade za vatrogastvo izuzeti su: državni organi i institucije, neprofitna udruženja, nevladine organizacije (domaće i međunarodne), javne ustanove i javna preduzeća kojima je osnivač Općina Maglaj, obrti koji se obavljaju izvan poslovnog prostora (na terenu i u stanu), poljoprivredni proizvođači koji obavljaju djelatnost isključivo na otvorenom prostoru, vjerske, obrazovne i predškolske ustanove.

NAČIN UTVRĐIVANJA NAKNADE ZA VATROGASTVO

Član 8.

Naknada za vatrogastvo određuje se prema jedinici površine koju koriste obveznici navedeni u članu 4., te prema požarnoj ugroženosti, a ona na godišnjem nivou iznosi:

- | | |
|--|------------|
| - za I kategoriju visina naknade iznosi | 500,00 KM |
| - za II kategoriju visina naknade iznosi | 350,00 KM |
| - za III kategoriju visina naknade iznosi | 300,00 KM |
| - za IV kategoriju visina naknade iznosi | 250,00 KM |
| - za V kategoriju visina naknade iznosi | 100,00 KM |
| - za VI kategoriju visina naknade iznosi | 60,00 KM |
| - za VII kategoriju visina naknade iznosi | 25,00 KM |
| - za VIII kategoriju visina naknade iznosi | 0,50 KM/ha |

Član 9.

Ukoliko je obveznik naknade za vatrogastvo vlasnik ili korisnik 3 (tri) i više poslovnih prostora iste namjene, naknada će mu se utvrditi za najviša dva poslovna prostora iz pripadajuće najveće kategorije.

Ukoliko je obveznik naknade za vatrogastvo vlasnik ili korisnik 3 (tri) i više poslovnih prostora različite namjene, naknada će mu se utvrditi za najviše dva poslovna prostora iz pripadajuće najveće kategorije svih kategoriziranih poslovnih prostora.

Prvi i drugi stav ovog člana se ne odnosi na I, II i III kategoriju poslovnih prostora.

NAMJENA PRIKUPLJENIH SREDSTAVA IZ NAKNADE ZA VATROGASTVO

Član 10.

Sredstva koja će se ostvariti iz naknade po osnovu ove Odluke, koristit će se za:

- 1) nabavku vatrogasne opreme, tehničkih i drugih sredstava za vatrogasnu jedinicu,
- 2) održavanje opreme i vatrogasnih sredstava,
- 3) stručno obučavanje i osposobljavanje vatrogasaca,
- 4) investicionu izgradnju i opremanje objekata za potrebe vatrogasnih jedinica.

Član 11.

Utrošak sredstava naknade za vatrogastvo vrši se na osnovu godišnjeg Plana prihoda i rashoda naknade za vatrogastvo.

Plan utroška naknade za vatrogastvo donosi se do 31. decembra tekuće za narednu godinu.

NAČIN NAPLATE NAKNADE ZA VATROGASTVO

Član 12.

Služba civilne zaštite će, po stupanju na snagu ove Odluke, do 30. aprila tekuće godine (za koju se izdaje rješenje) izdati rješenja za obveznike naknade za vatrogastvo.

Član 13.

Naknada za vatrogastvo uplaćuje se na depozitni račun budžeta Općine Maglaj, najkasnije do kraja tekuće godine za koju je utvrđena obaveza plaćanja.

NADZOR NAD PROVOĐENJEM ODLUKE I KAZNENE ODREDBE

Član 14.

Nadzor i kaznene odredbe nad provođenjem ove Odluke vršit će se u skladu sa Zakonom o zaštiti od požara i vatrogastvu ("Službene novine Zeničko-dobojskog kantona", broj: 5/11), u skladu sa odredbama kojima je regulisan nadzor i kaznene odredbe.

Član 15.

Po žalbama protiv rješenja iz člana 12. ove Odluke u drugom stepenu odlučuje Drugostepena komisija Općinskog vijeća Maglaj.

Žalba se predaje putem općinskog organa koji je donio rješenje o naknadi za vatrogastvo, koja se zajedno sa spisom ožalbenog predmeta dostavlja drugostepenom organu na odlučivanje.

PRELAZNE I ZAVRŠNE ODREDBE

Član 16.

Obavezuje se nadležna služba da uredi bazu podataka i izradi rješenja u skladu sa ovom Odlukom.

Član 17.

Ova Odluka stupa na snagu osmog dana od dana objavljivanja u „Službenim novinama Općine Maglaj“.

Broj akta:

Maglaj,

PREDSJEDAVALA

Svjetlana Zamboni

OBRAZLOŽENJE :

I PRAVNI OSNOV

Pravni osnov za donošenje Odluke o naknadama za vatrogastvo Općine Maglaj sadržan je u članu 124. tačka f) Zakona o zaštiti od požara i vatrogastvu ("Službene novine Zeničko-dobojskog kantona", broj: 5/11), članu 7. Pravilnika o uslovima, osnovama i kriterijima za razvrstavanje građevina u kategorije ugroženosti od požara ("Službene novine Federacije BiH" broj: 79/11) i članu 18. Statuta Općine Maglaj- prečišćen tekst ("Službene novine Općine Maglaj", br. 8/07, 3/08 i 6/08). U vezi sa članom 124. tačka f) Zakona o zaštiti od požara i vatrogastvu ("Službene novine Zeničko-dobojskog kantona", broj: 5/11), članom 132. istog Zakona, definira se mogućnost, forma i način donošenja Odluke o taksama odnosno naknadama za vatrogastvo.

II RAZLOZI ZA DONOŠENJE

Razlozi za donošenje ove Odluke, osim temeljenja u zakonima, proizilaze iz potrebe unapređenja zaštite od požara, a prije svega vatrogasne djelatnosti na području općine Maglaj. Svi smo svjedoci sušnih perioda, koji u velikoj mjeri utječu i na povećanje broja vatrogasnih intervencija. Cijeneći činjenicu da je veći dio teritorije općine Maglaj pokriven šumama, nimalo ne čudi da, iz godine u godinu, profesionalna vatrogasna jedinica općine Maglaj bilježi sve veći broj intervencija gašenja šumskih požara. Nadalje, gotovo da je "vidljiv" svakodnevni porast požarnog opterećenja, determiniran izgradnjom novih poslovnih i stambenih objekata, na novim lokacijama i nerijetko sa novim tehnologijama, tako da se i broj vatrogasnih intervencija na objektima, iz godine u godinu povećava. Pridodajući ovim intervencijama i sve ostale tehničke intervencije vezane u prvom redu za spašavanja prilikom saobraćajnih, ali i drugih nesreća, onda je jasno, da vatrogasna jedinica kao jedina operativna struktura zaštite i spašavanja sa 24-satnim dežurstvom, mora biti i adekvatno opremljena kako bi uopće mogla obavljati svoju humanu i zakonom propisanu djelatnost. Stoga, uzimajući u obzir činjenicu da su vatrogasna vozila, sprave i oprema izuzetno skupi, pozivajući se na načelo solidarnosti i činjenicu da se ovaj vid pomoći, mora pružiti i pruža svakom, u slučaju nastanka požara ili druge nesreće na području općine Maglaj, temeljimo drugi razlog donošenja ove Odluke.

Obradivač: Haris Šahman

Kontrolor: Anto Maglica



PREDLAGAČ:

OPĆINSKI NAČELNIK

Mirsad Mahmutagić



